

अपनी बिरज, अपनी भासा

बिरज भासा पतरिका

अपरेल ते जून-2020

तईयार करबे बारे:-

जगदीश चन्द नैहचैनिया और सतवीर चौधरी

मदत करबे बारे:-

मुकेश कुमार योगी, रतन लाल योगी और कविता योगी



सूविचार

- जो आदमी अपनी सोच ना बदल सकै, बू हकीकत में कछू ना बदल सकै।
- बादाम खाये ते इतनी अकल ना आबै जितनी धोखौ खाये ते आबै।
- हर छोटौ बदलाव ही बड़ी सफलता कौ हिस्सा हैबै।

सरकारी योजना

प्रधानमंत्री गरीब कल्याण योजना

लॉन्च की तारीख: 25 मार्च 2020

मकसद : COVID-19 ते पिरभावित लोगन तक पईसा की मदत पोंहचानौ और महामारी के समै में उनकी मूलभूत जरूरतन कौ ध्यान रखनौ।

प्रधानमंत्री गरीब कल्याण योजना COVID-19 अथवा कोरोना वायरस ते फैली महामारी ते पिरभावित लोगन कूं राहत पौहचावे काजें चालू करी गई है। या योजना के जरिये ते भारत सरकार गरीब लोगन कूं मुफ्त में अनाज दाल और अन्य समग्री देगी, महिलाओं के जन- धन खातेन में 3 महीना तक 500 रुपए हर महीना जमा करे जायेंगे, स्वास्थ्य कर्मचारीन काजें बीमा और अन्य कई प्रकार की सेवाएं प्रदान करी जायेंगी।

कहानी

लालच कौ फल

एक किसान के बाग में आम कौ पेड औ। बा पेड पै खूब फल लगरे। किसान एक दिना जिमींदार ऐ खुस करबे कूं बा काजें कछू आम लै गयौ। जिमींदार नै आम खाये तौ भौत खुस हुयौ। और बाय फल पसंद आगे और बानै जिद कर लई कि बू बा पेड ऐ जरुर खुसा कैं लाबैगौ। बानै अपने आदमी भेजकैं किसान के खेत में ते पेड उखरबाकैं अपने खेत में लगबा दियौ। बेचरौ गरीब किसान कछू ना बोल सकौ। पर पेड उखारबे की टैम पै बाकी जरन कूं भौत नुकसान पौहचौ। या जिगह ते जब नई जिगह पै पेड लगायौ गयौ तौ जर ना पकर सकौ। पेड धीरें-धीरें सूखकैं एक दिना बरबाद हैगौ। जब किसान ऐ या बात कौ पतौ चलौ तौ ऊ भौत उदास हैगौ और धीमी अवाज में बोलौ लालच कौ फल यही हैबै। अगर बू या पेड ऐ ना उखरबातौ तौ आज भी बामैं मीठे फल लगते और हम दोनून कूं मिलते रहते। पर अब हम दोनून में ते कोई कूं भी ऐसे फल ना मिलेंगे।

चुटकला

1. एक छोरा नै अपने बाप ते पूछी अगर मैं कार चोरी कर लूं तौ काह होगौ।
तौ बाप बोलौ चोरी करनौ गलत बात है, तू जेल जायगौ और काह होगौ।
छोरा घबरायौ और बानै बेचैनी बात बदली फिर बाप ते बोलौ मेरी गैर
मौजूदगी में तुम कार की सरबिस तौ करा ले करिंगे। बाप बोलौ हां सरबिस
तौ करा ले करुंगौ।

लोक-गीत

1. छोरा तू एम ए मैं बी ए पढ़ी चल सादी करलैं दोनूं जने
छोरा पापा तौ मेरौ मनै करै चल मम्मी को मनालैं दोनूं जने
2. छोरा तू एम ए मैं बी ए पढ़ी चल सादी करलैं दोनूं जने
छोरा ताऊ तौ मेरौ मनै करै चल ताईयै मनालैं दोनूं जने
3. छोरा तू एम ए मैं बी ए पढ़ी चल सादी करलैं दोनूं जने
छोरा चाचा तौ मेरौ मनै करै चल चाची को मनालैं दोनूं जने
4. छोरा तू एम ए मैं बी ए पढ़ी चल सादी करलैं दोनूं जने
छोरा भईया तौ मेरौ मनै करै चल भाभी ऐ मनालैं दोनूं जने

पहेली

1. आठ हात कौ चौतरा पच्चीस हात की डोर, खीचिंगे बालक बच्चे को
कहेगौ मोर।

उत्तर- हुक्का।

2. हरी थी मन भरी थी राजा जी के बाग मे दुसाला ओर खडी थी।

उत्तर- मक्का।

भजन

टेक- कान्हा मोय पियर ते लै आयौ मीठौ बोल-बोल कै

1. कान्हा मोय ऐसौ टीकौ लईयौ तखरी में तोल-तोल कै
राधा सौनौ हैगौ तेज सुन लेऔ कान खोल कै

कान्हा मरुंगी जैहर खाय कटोरी में घोर-घोर कै

कान्हा मोय पियर ते लै आयौ मीठौ बोल-बोल कै

2. कान्हा मोय ऐसौ कुन्डल लईयौ तखरी में तोल-तोल कै

राधा सौनौ हैगौ तेज सुन लेऔ कान खोल कै

कान्हा मरुंगी जैहर खाय कटोरी में घोर-घोर कै

कान्हा मोय पियर ते लै आयौ मीठौ बोल-बोल कै

3. कान्हा मोय ऐसी नथली लईयौ तखरी में तोल-तोल कै

राधा सौनौ हैगौ तेज सुन लेऔ कान खोल कै

कान्हा मरुंगी जैहर खाय कटोरी में घोर-घोर कै

कान्हा मोय पियर ते लै आयौ मीठौ बोल-बोल कै

4. कान्हा मोय ऐसी अंगूठी लईयौ तखरी में तोल-तोल कै

राधा सौनौ हैगौ तेज सुन लेऔ कान खोल कै

कान्हा मरुंगी जैहर खाय कटोरी में घोर-घोर कै

कान्हा मोय पियर ते लै आयौ मीठौ बोल-बोल कै

सम्पर्क

निर्माण सोसायटी

सहारई रोड़, ब्लू बर्ड स्कूल के पास,

डीग, भरतपुर, राजस्थान- 321203

Mob.- 9587593455, 8058909393, 9772581250

Email-rajasthanlanguages@nirmaan.org.in

Web.-www.nirmaan.org.in

कागजी

जमीन पै

कलम

कौ हर

चलामैं,

तेरे प्यार

की

मजदूरी

में

सब्दन

के

फसल

उगामैं